

www.BibleForChildren.org



John 14



Jedus tell e ciple dem say, "Mus dohn leh oona haat be hebby. Mus trus God, an trus een me too. Plenty room dey een me Fada house. A gwine dey fa mek de place ready fa oona. Ef e ain been so, A been fa tell oona."



"An atta A done mek de place ready fa oona, A gwine come back fa tek oona wid me an go ta dat place so dat oona too gwine be weh A da."



A, John, oona Christian broda. We all da folla Jedus
togeda. Een Christ we all beah op scrong onda
all we suffrin. An we leh Jedus Christ rule

oba we. Cause A beena tell
people God wod an de



trute bout Jedus, dey
chunk me pon de
island call Patmos.




Jes den God Sperit come pon me. Dey een heaben A
see one shrone, a big chair wa king kin seddown pon.
An A see somebody da sit pon um.




Den A yeh all de ting dem wa got life een heaben, een dis wol an onda de wol, an all ting wa een de sea.

Dey all sing, say, "Ta de one wa da seddown pon de shrone, an ta de Lamb, Leh we praise um an gim hona an glory, an show dey powa faeba an eba!"




Den A see God City, de nyew Jerusalem, da come down outta heaben fom God. De city been all ready, like a bride git all ready an dress op fine fa go ta e husban. A yeh a loud boice wa come fom de shrone say, "Look yah! Fom now on, God da mek e home wid e people! E gwine lib wid um an dey gwine be e people. God esef gwine be dey wid um all de time, an e gwine be dey God."



Den de angel show me de riba weh de wata wa da gii
life beena ron. E beena shine bright an cleah jes like
glass. An e da leh outta de shrone ob God an ob de
Lamb.



De city ain need no sun fa shine dey. An e ain need no moon. Cause de glory light wa come out fom God an fom de Lamb da light de city.




Bot ain nottin bad neba
gwine go eenta de city.
An nobody wa da do
dem dorty ting wa mek
people too shame ain
neba gwine go dey.
Same way so, dem
people wa ain tell de
trute, dey ain neba
gwine een um. Dem
people wa gwine go
eenside de city, dey de
people wa name done
been write down een
de Lamb book ob life.




"E gwine wipe ebry teah outta dey eye. Dey ain neba gwine cry no mo. Dey ain neba gwine dead no mo, an ain nobody neba gwine git hebbly haat. Dey ain neba gwine suffa no pain. Cause dem ole ting wa been dey fus done pass way."




An nottin or nobody wa God say ain right gwine be dey een dat city. De shrone ob God an ob de Lamb gwine be dey, an e saabant dem gwine woshup um dey. Dey gwine see God face, an e name gwine be dey pon dey forehead.




An A see de people dem wa done been dead, dem big man an dem leetle man, dey all da stanop fo de shrone. Somebody open some book op. Den e open one oda book, weh de people dem wa got life faeba an eba stanop wid God, dem name been write down. All wa de people dem wa been dead been do fo dey dead, dat been write down een dem fus book.



An God been jedge dem coddin ta dem book. De poson wa ain got e name write down een de book weh dey write de people dem wa got life faeba an eba, dey chunk dat poson eenta de lake ob fire.



De Holy Sperit, an de Bride say, "Come!" Leh all dem wa yeh dem wod ya say, "Come!" Leh all dem wa tosty come. All dem wa wahn fa drink dat wata wa da gii life, leh um come an drink free.



Cause God lob all de people een de
wol sommuch dat e gii we e onliest
Son. God sen we um so dat ebrybody
wa bleebe pon um ain gwine dead.
Dey gwine lib faebamo.



Rome 3:23 All people done sin an ain able fa do right nuff
fa medja op ta God glory.

Rome 6:23 Cause det de payback ob sin, bot life dat las
faeba an eba God gii we fa free. We git dat life wen we
come fa be one wid Jedus Christ we Lawd.

Hebrew 9:27 All people haffa dead one time. An atta dey
done dead, God gwine jedge um fa all dey done do.

Ephesus 2:8,9 Wen God sabe oona, dat ain been cause
dat fittin coddin ta wa ya done do. E done dis cause oona
trus een Christ. Eben dat trus wa oona got ain come fom
oonasef. E de gif fom God. So den, oona ain got nottin fa
brag bout, cause dey ain nottin oona kin do
fa sabe oonasef.



Rome 10:9,10 Cause ef ya tell de people say "Jedus, e Lawd" an ya bleebe een ya haat dat God mek Jedus git op fom mongst de dead people an lib gin, den God gwine sabe ya. Cause wen we bleebe pon Jedus een we haat, God mek all ting right twix we an esef. An wen we tell people say we bleebe pon Jedus, God sabe we.

John 3:16,17 Cause God lob all de people een de wol sommuch dat e gii we e onliest Son. God sen we um so dat ebrybody wa bleebe pon um ain gwine dead. Dey gwine lib faebamo. God ain sen e Son eenta de wol fa condemn um. God sen e Son fa come sabe de people shru e Son.



1 John 5:11-13 De ting wa God say, e dis: God gii we de true life wa ain gwine neba end. An dis life een e Son. De one wa hab God Son een e haat, e got dis true life. Bot de one wa ain hab God Son een e haat, e ain got dat life. A da write dis ta oona wa bleebe pon de name ob God Son. A da write oona fa mek oona know, oona hab de true life wa ain gwine neba end.



John 14; 2 Corinth 5; Revelation 4, 21, 22

Storyline by: Edward D. Hughes

Illustrated by: Lazarus
and Alastair Paterson

Adapted by: Sarah S.

Sea Island Creole English NT (gul) © 2005, Wycliffe Bible
Translators, Inc. All rights reserved.

<https://www.bible.com/ur/bible/585/MAT.1>

©2025 Bible for Children, Inc.

www.M1914.org

www.bibleforchildren.org

